

**Herman Tino tidak jadi bertanding Dun Kajang**  
**Astro Awani**  
**6 Mac, 2014**

**KUALA LUMPUR:** Penyanyi dangdut, Herman Tino yang sebelum ini menawarkan diri bertanding sebagai calon bebas dalam pilihan raya kecil DUN Kajang hari ini mengumumkan tidak akan mencalonkan dirinya pada penamaan calon Selasa ini.

Katanya, beliau tidak akan bertanding dalam pilihan raya kecil itu kerana tidak rela dituduh mahu mengacau undi atau telah dibayar oleh pihak tertentu.

"Saya tidak mahu gelaran pengacau undi, cari habuan, cari publisiti murah atau rasuah dari PRU13 – P95 Tg Karang dan PRK N25 Kajang," katanya dalam satu kenyataan media.

Herman Tino atau nama sebenarnya Masrun Tamsi sebelum ini bertanding sebagai calon bebas dalam pilihan raya umum ke-13 bagi kerusi Parlimen Tanjong Karang menentang calon Barisan Nasional, Datuk Seri Noh Omar dan calon PAS, Mohamad Rashdi Deraman.

Kerusi Parlimen Tanjong Karang itu dimenangi oleh Noh yang mendapat 20,548 undi mengalahkan calon PAS dengan majoriti 4.394 undi. Herman hanya meraih 340 undi dan hilang wang pertaruhan.

Herman mengaku beliau tidak ada jentera pilihan raya dan "jika bertanding pun cuma hanya ingin menyatakan protes dan mahu bersuara."

"Saya akan dituduh sebagai pengacau undi dan mengambil habuan untuk kepentingan diri walaupun saya tidak berbuat begitu apabila bertanding.

"Saya hanyalah seorang penyanyi yang hanya menerima duit dari hasil kerja dan karya saya sebagai penyanyi. Untuk itu, saya menghormati dua parti politik yang dominan untuk lebih layak bertanding," katanya.

Dalam pada itu, Herman turut menyeru bekas Menteri di Jabatan Perdana Menteri, Datuk Zaid Ibrahim dan mana-mana bakal calon bebas yang lain untuk ikut sama tidak bertanding dalam pilihan raya kecil DUN Kajang.

"Kita hanyalah calon bebas dan peserta demokrasi, yang memahami dan pandai mengukur diri," kata Herman.

Pilihan raya kecil DUN Kajang yang ditetapkan pada 23 Mac ini setakat ini dijangka akan ditandingi oleh calon Parti Keadilan Rakyat, Datuk Seri Anwar Ibrahim dan calon BN, Datin Paduka Chew Mei Fun serta beberapa calon bebas termasuk Zaid.

Herman sebelum ini membuat pengumuman melalui Twitter menawarkan diri untuk jadi wakil rakyat DUN Kajang.

Beliau juga mencipta sebuah lagu khusus untuk pengundi Kajang dan memuatkan lagu berkenaan di YouTube.

Isteri beliau, Noraini Ibnu kemudian membuat satu kenyataan berharap suaminya tidak meneruskan hasratnya itu kerana akan dihina dan diketawakan oleh masyarakat.

"Saya terima Herman sebagai suami kerana dia seorang penyanyi, bukannya ahli politik. Dia bukannya ada wang yang banyak untuk 'melayan' perkara-perkara politik macam itu.

"Saya tidak suka dia 'membakar diri' dan menerangi yang lain, sedangkan tuanya nanti tidak ada siapa yang peduli.

"Sebagai isteri, saya tidak senang apabila tindak tanduknya diketawakan dan dihina pula," kata Noraini seperti dipetik oleh mStar Online.

Copyright © Astro Awani Network Sdn. Bhd. 2014 (535275-D).

Source: <http://www.astroawani.com/news/show/herman-tino-tidak-jadi-bertanding-dun-kajang-31360?cp>